

推
步
法
解



推
步
法
解

江
永
撰

中
華
書
局

叢書集成初編

推步法解

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

推步法解

此據守山閣叢書
本排印初編各叢
書僅有此本

推步法解卷一

清 婺源江永撰

推日躔法

用數

康熙二十三年甲子天正冬至爲歷元。

歷必有元。所以爲步算之端。古術先爲日法。以今日月五星之行推而上之。必得甲子歲前十一月甲子朔夜半冬至七曜齊同之年以爲元。荒遠無徵。自漢太初三統而後。一術輒更一元。元授時術始革其失。測定氣應。閏應。轉應。交應。五星合應。歷應。卽以至元辛巳爲元。不用積年日法。明大統法因之。季年用西法。擬改憲以崇禎戊辰爲元。我朝因其新法。諸平行歲。歲有根數。隨年皆可爲元。此定康熙甲子紀首之年爲元。用授時立應之法。上考下求。皆以是年諸應爲根。天正冬至者。甲子年前之平冬至。實癸亥年十一月。推步必以前前冬至爲首。履端于始之義也。

周天度

三百六十。入算化作一百二十九萬六千秒平分之。
爲牛周四分之二。爲象限十二分之二。爲宮。

此周天整度也。古法用日度三百六十五度有奇。奇零之數。不便分析。故以三百六十整齊之。或曰。天本無度。因日之行而生度。可以臆縮之乎。曰。天道恆以整齊者爲體。以奇零不齊者爲用。如十千十二

支相配而爲六十。此整齊者也。六其六十。則爲三百六十矣。一歲必多五日有奇。天之用數也。要其體數則恆爲三百六十。故易曰。乾之策二百一十有六。坤之策百四十有四。凡三百有六十。當期之日。亦以其體數言之。實則當期之度也。自太陽一日右旋之軌迹而觀之。似一日平行一度而無餘。自體數三百六十度而觀。乃是一日平行一度而不足。即謂周天實止三百六十度。因日行有不足之數而生五日有奇之贏數。亦無不可也。天者統而言之。七政恆星各居一重天。皆以三百六十度爲周天。經度如斯。緯度亦然。即地之經緯度亦然。凡諸天之小輪。皆可析爲十二宮。剖爲三百八十度。又若三角八線。萬有不齊之數。皆可以整齊者御之。

度法

六十。分秒微以下皆以六十迭析。

三百六十度者。六其六十度。分以下亦皆以六十爲法。其不用百分何也。八線表及渾儀以六十析度。爲得疏密之中。又一小時六十分。與度法相當。亦取便於變時也。

歲周三百六十五日二四二一八七五。歲周小餘係五時三刻三分四十五秒。將時刻分化秒。用萬分通之。得二千四百二十一。分小餘八七五。凡此者。所以便布算也。後

平行諸應通法皆做此。

歲周即歲實。此太陽平行之平歲實也。今時太陽最卑近冬至。平行處近春分。測累年春分前後相距。則得平歲實如是。若以定冬至相距。其小餘必稍贏。猶之月朔當轉終。則時刻必多于朔策。且太陽小

輪古更大於今。其贏數愈多。回回之法。三百六十五日爲平年。多一日爲閏年。一百二十八年閏三十日。此小餘萬分日之二四二一八七五。正合一百二十八分之三十一。又考崇禎新書日躔表說云。新法依百分算。定用平行歲實爲三百六十五日二十四刻二十一分八十八秒六十四微。尾數多一秒一十四微。截去不用。豈欲取五時三刻三分四十五秒之整數。秒下之微。其數可省與。一秒一十四微。僅當六微弱耳。雖積之久。其數不多也。通分之法。以五時三刻三分四十五秒化作二萬零九百二十五秒。與萬相乘爲實。以一日八萬六千四百秒爲法。除之。得二四二一八七五。歲差五十一秒。

太陽行黃道已周。尙有不及列宿天之數。謂之歲差。實由恆星天日日有東行之細數。積之一歲行五十一秒也。七十年行五十九分三十秒。幾及一度。

日法一千四百四十。

古法一日百刻。不便於均派十二時。今法定爲九十六刻。刻十五分。合之一千四百四十分。一刻用十五分者。合四刻爲一小時。六十分與度法相當也。分下秒微亦以六十迭析。一日化秒八萬六千四百秒。

日周通法一萬。

萬分者、授時之法。今仍用爲通法。
紀法、六十。

甲子六十日也。

宿法、二十八。

日有值日之宿。猶之六甲值日。古法無之。

太陽每日平行三千五百四十八秒三三〇五一六九。

以周天一百二十九萬六千秒乘日周通法。以歲周除之。得每日平行秒數及小餘。以六十分法約之。
五十九分八秒一十九微奇也。

最卑歲行六十一秒一六六六六。

最卑者、太陽本輪底之一點。舊曰最高衝。或曰高衝。今定名最卑。此點亦有行度。與月孛五星最高同理。不用最高而用最卑者。近冬至故也。歲行一分一秒一十微。五十九年弱行一度。
最卑日行十分秒之一又六七四六九。

太陽距最卑爲自行引數。每日之行雖甚微。亦當加之。

本天半徑一千萬。

日月五星各麗一重天。則各有其本天。自下而上。一、太陰。二、水星。三、金星。四、太陽。五、火星。六、木星。七、土星。本天皆以地心爲心。其半徑大小甚相懸。常設一千萬者。整數便于算也。太陽本天距地比例數見推月食法。

本輪半徑、二十六萬八千八百一十二。

均輪半徑、八萬九千六百〇四。

本輪、均輪、太陽盈縮之所由生也。本輪之心在本天。均輪之心在本輪。太陽實體在均輪。遇最卑。在本輪之頂。遇最高。在均輪之底。其行也。本天隨動天左旋。不及動天之速。因有右旋之度。本天右旋。則本輪之心亦隨之右旋。太陽每日平行之數。即本輪心行於本天之數。其歲周即本輪心隨本天一周之數也。然本輪心又有逐日離最卑之度。則本輪又自左旋。本輪左旋。而均輪心亦隨之左旋。歲周之外有餘分。逐及最卑。則本輪帶均輪一周矣。然均輪心雖隨本輪左旋。而均輪又自右旋。太陽在均輪上亦隨之右旋。其度恆以倍。本輪左旋一度。均輪右旋兩度。本輪一周。均輪則兩周也。太陽隨均輪在本輪心之左。則加于平行。在本輪心之右。則減於平行。其加減之度分秒必均。故謂之均輪。月五星之本輪均輪半徑有定。太陽則不然。古大而今漸小。此本輪均輪半徑之數。蓋崇禎戊辰所測。其加減最大之均數。二度三分有奇。今時似不及此數。本輪半徑約二十五萬一千五百九十五。均輪半徑約八萬三千八百六十五。最大之均。一度五十

五分而已。顧其大不知何時始。其小不知何時復。此則非今日所能知。惟隨時測驗修改耳。均輪常居本輪三之一。

氣應七日六五六三七四九二六。

歷元天正冬至。辛未日也。初日起甲子。七日爲辛未。其小餘剩八萬六千四百秒。以萬分法除之。五萬六千七百一十秒七九三六零六四。以時分秒收之。十五小時四十五分一十秒四十七微三十六纖奇。平冬至。辛未日申初三刻零一十一秒。

宿應五日六五六三七四九二六。

辛未日尾值宿也。初日起角宿。五日爲尾。

最卑應七度一十分一十一秒一十微。

辛未次日子正時最卑行也。以減太陽平行爲太陽自行。自元至元以前。最卑在冬至前。至元以後。最卑在冬至後。惟至元間與冬至同度。至是年。行七度有奇。冬至後八日。乃當最卑。夏至後亦八日。當最高。是爲盈縮之初。恆以冬至爲盈初。夏至爲縮初者。非也。

求天正冬至

求平冬至也。若求定冬至。須實算日躔初宮初度。見後求節氣時刻條。

置歲周以距歷元之積年。上下求將來則從歷元順推。上考往古則從歷元逆溯。減一乘之。

距年恆數算外須減一乃是實距。如甲戌距甲子十一年實距十年。

得中積分。

積日併小餘。

加氣應。上考往古減氣應。

加減七日有奇之氣應。乃得甲子後幾日。

滿紀法去之。

六旬周故也。

餘爲天正冬至日分。上考往古則以所餘轉與紀法相減。餘爲天正冬至日分。自初日起甲子。其小餘以日法通之。如法收爲時刻。周

通法爲一率。小餘爲二率。日法爲三率。求得四率。爲時分滿六十分收爲一小時。十五分收爲一刻。

三率法見後條註。分下有秒。其數小可略。小數過半收爲分。未過半棄之。後凡求時刻相同。

初時起子正。一時爲丑初。以至二十三時爲夜子初。

求天正冬至小餘。爲後條求年根秒數張本。若小餘當某時某刻某分。此爲平冬至。不以註書。亦求之者。重歲始。且與定冬至時刻相較先後也。小寒後二十三平氣。則可略之矣。凡最卑在冬至前者。平冬

至在定冬至後。最卑在冬至後者。反之。

求平行

以日周通法爲一率。太陽每日平行爲二率。天正冬至小餘與日周通法相減餘爲三率。如氣應小餘六五六三七四九二六。與日周通法相減餘爲三四三六二五零七四。

求得四率。二率與三率相乘。一率除之。即得四率。後做此。

此三率法。即異乘同除之法。相乘者。實數。除之者。法數也。二率三率可互易。凡三率中有百千萬之整數。爲二三率者。進位即可省乘。爲一率者。退位即可省除。

爲年根秒數。

平冬至次日子正時。太陽平行若干秒也。以平冬至小餘與日周通法相減之餘爲三率。其餘數之時刻。太陽平行得若干秒。是爲次日子正時之秒。亦即爲一年之根。年根必次日子正時者。便於相加得整日。所求皆得子正時之度秒也。

又置太陽每日平行。以本日距天正冬至之日數乘之。得數爲秒。與年根相併。以宮度分收之。爲平行。一十萬八千秒爲宮。三千六百秒爲度。六十秒爲分。

求實行

置最卑歲行以積年乘之。又置最卑日行以距天正冬至之日數乘之。兩數相併。內加最卑應。上考則減最卑應。以減平行。得引數。

太陽平行距最卑之數。亦即均輪心行本輪周之數。用直角三角形。

小句股形也。

以本輪半徑三分之二爲對直角之邊。

本輪半徑減去均輪半徑。其餘三分之二。如以八九六零四減二六八八二。其餘一七九二零八也。此邊爲小弦。從本輪心抵均輪底。與正方角相對。以引數爲一角。

此角轉本輪心。引數度在本輪周。即其角之度。

求得對角之邊。

此邊爲小句。用正弦比例檢八線表。半徑千萬爲一率。引數度正弦爲二率。對直角之邊爲三率。求得四率。爲對角之邊。從直角抵均輪底。與小弦相交。引數過一象限者。與半周相減。過二象限者。減去半周。過三象限者。與全周相減。皆用其餘爲二率。

倍之。

凡引數左旋一度。則均輪右旋兩度。太陽實體在其上。前求對角之邊。雖抵均輪之底。尚未抵太陽。故更引長而倍之。所以用倍數何也。合本輪均輪半徑三五八四一六與本輪半徑三分之二。加一倍。故此邊恆用倍。其所加之一倍。即均輪上倍引數度之通弦。爲太陽實體所在。

又求得對餘角之邊。

此邊爲小股。用餘弦比例。半徑千萬爲一率。引數度餘弦爲二率。對直角之邊爲三率。求得四率。爲對餘角之邊。從直角抵本輪心。用第二率之法同上。

與半徑相加減。引數三宮至八宮則相加。九宮至二宮則相減。

本天之半徑也。本輪上六宮相加。下六宮相減。

復用直角三角形。

大句股形也。

以加倍之數爲小邊。加減半徑之數爲大邊。直角在兩邊之中。

小邊爲大句。大邊爲大股。

求得對小邊之角。爲均數。

用切線比例。大邊爲一率。小邊爲二率。半徑千萬爲三率。求得四率爲正切。以正切檢表。得角度。此角輳地心。

置平行。以均數加減之。

引數初宮至五宮爲加。六宮至十一宮爲減。

初宮起最卑。故與月五星之加減相反。

得實行。

平行者。本輪心當黃道之度。實行者。太陽實體當黃道之度。

求宿度

以積年乘歲差。得數加黃道宿鈴。

鈴見卷後。

以減實行。餘爲日躔宿度。若實行不及減宿鈴。退一宿減之。

積年乘歲差加黃道宿鈴者。加入相近之經度宿也。以減太陽實行。則得日躔宿度矣。然所得皆本日子正時宿度。若當兩宿交界之際。欲求易宿時刻。當倣後求節氣時刻之法。於易宿之日。以本日太陽實行與次日實行相減。餘爲一率。日法爲二率。本日子正實行與本宿相減。餘爲三率。求得四率。爲距子正後分數。乃以時刻收之。即得次宿時刻。

求值宿

置中積分。加宿應滿宿法。去之餘數。加一日。爲值宿。初日起角宿。

如三百六十有奇。滿宿法。去三百六十四日。餘一日有奇。加一日。是亢宿。

求節氣時刻

日躔初宮^丑初度爲冬至。十五度爲小寒。一宮^子初度爲大寒。十五度爲立春。二宮^亥初度爲雨水。十五度爲驚蟄。三宮^戌初度爲春分。十五度爲清明。四宮^酉初度爲穀雨。十五度爲立夏。五宮^申初度爲小滿。十五度爲芒種。六宮^未初度爲夏至。十五度爲小暑。七宮^午初度爲大暑。十五度爲立秋。八宮^巳初度爲處暑。十五度爲白露。九宮^辰初度爲秋分。十五度爲寒露。十宮^卯初度爲霜降。十五度爲立冬。十一宮^寅初度爲小雪。十五度爲大雪。

此黃道上分界定度。太陽實行到此。爲真節氣。因太陽有加減之度。故黃道上度均而時日不均。古法不知太陽盈縮者。固非。知盈縮有定氣。而仍以恆氣注歷者。亦非。況其所爲恆氣者。又不以平冬至爲根。而以定冬至起算。其所爲盈縮者。又不知有推移。而常定於二至。則恆氣固謬。而定氣亦非真。

皆以子正日躔未交節氣宮度爲本日。已過節氣宮度爲次日。推時刻之法。以本日實行與次日實行相減爲一率。日法爲二率。本日子正實行與節氣相減爲三率。如推立春則以本日實行與一宮十五度相減。餘數做此。求得四率。爲距子正後之分數。乃以時刻收之。即得節氣初正時刻。如實行適與節氣宮度相符而無餘分。即爲子正初刻。

後推月離交食。皆有求用時之法。此求節氣。即以平時爲眞時矣。若密測太陽時刻方位。仍當用求時差之法。

至於各省節氣時刻。皆以京師爲主。視偏度加減之。偏東一度。加時之四分。偏西一度。減時之四分。

地是圓形。人所居東西不同經。則時刻異。如此方視太陽正中爲午正。東方視之。已過中。西方視之。未至中。故節氣時刻西早而東晚。地經差十五度者。時差四刻。故一度加減四分。

求日出入晝夜時刻

以本天半徑爲一率。北極高度之正切。

以高度查入緯表得之。爲二率。本日距緯度。以實行查黃赤距表詳後。

正切爲三率。求得四率。爲赤道之正弦。

從圓心出線至北極。爲半徑。則極高切線與赤道平行。而距緯切線與半徑線平行。其勢同。故能爲句股比例。距緯切線最大者。四三四六四也。必求赤道者。時以赤道爲宗也。

檢八線表。得日出入在卯酉前後赤道度。變爲時分。一度變時之四分。十五分變時之一分。凡言變時者。做此。

太陽與赤道平行。左旋繞地一周。三百六十度。分七十二時。故一宮當一大時。十五度當一小時。一度當時四分。此赤道度變時之理也。

以加減卯酉時。即得日出入時刻。春分前秋分後。以加卯正爲日出時刻。以減酉正爲日入時刻。自日出春分後秋分前。以減卯正爲日出時刻。以加酉正爲日入時刻。